



MONTESSU EST IN S'UNESCO!

17 SITUS ARRECONNOTUS CHE PATRIMÒNIU CULTURALI DE S'UMANIDADI

D De mesi de argiolas is Domus de Janas funt intradas in s'UNESCO.

Dd'ant decìdiu in Parigi aundi sa Cummissioni internatzionali ddas at iscritas in sa lista de su Patrimòniu Mundiali impari a àterus 16 situs sardus, gai totus de Cabu de Susu. Ma est siguru ca sa **Necròpoli de Montessu**, prenda de su territòriu baroniesu, at tentu unu ruolu de importu mannu meda. Infatis est unu de is pagus situs gestius chi oferrit bìsitas ghiadas e contat assumancus 35 tumbas chi is antigus ant fatu stuvendi s'arroca moddi de unu anfiteatru naturali de bellesa spantosa. Nd'agataus de genia differenti: a forru, a putzu, a santuàriu e unas cantu ondradas de spiralis e corrus. Sa spera de is amministradoris baroniesus - chi in is ùrtimus annus ant postu atentu mannu in su situ - est chi su logu si trasformit de diaderus in unu volanu de svilupu econòmicu chi fatzat a connosci sa bidde e totu su Sulcis de Bàsciu puru.



Montessu: tumba santuàriu n.7 Sa Tuta de is Procus

ARRESI

ONORADA SA MEMÒRIA DE BASILIO SULIS

Su 5 e su 6 de cabudanni s'Amministracioni arresina impari a su *CCN Tra Dune e Nuraghi* at onorau sa memòria de **Basilio Sulis**, s'òmini chi at imbentau su festival "**Ai confini tra Sardegna e Jazz**": infatis 40 annus agoa iat organizau su primu cuncertu in Pratzza de su Nuraxi e, a annu infatu, fiat incumentzada sa rassigna chi at fatu lompi in Arresi is mellus artistas de totu su

mundu. Duncas est andada genti meda a ascurtai is cuncertus e a castiai sa mostra fotogràfica e is documentàrius chi ant proietau in pratzza. In sa targa chi ant apicau ddoi est scritu chi **Basilio Sulis nc'at passau is làcanas intr'e Sardigna e Jazz**: est pròpiu gràtzias a custa rassigna chi is arresinus ant incumentzau a "s'oberri ancora de prus a su mundu" incarrerendi su svilupu turìsticu de su territòriu.

TEULADA

Su 13 de austu passau su centru stòricu at torrau a fueddai. Infatis su grupu teatrali de s'assòtziu **Is Sinnus** at recitau sa scenegiadura de **Anna Pina Buttiglieri**, tirada de s'òpera de Salvatore Loi "**Le strade parlanti**", aundi s'autori contat fatus e personàgius, mannus e minoris, chi ant fatu sa stòria de Teulada. S'initziativa at tentu unu sucessu clamorosu: infatis fiant gai 200 is chi funt andaus avatu a is atoris diletantis in is arrugas e in is pratzas de su centru stòricu. Aici ant pòtziu connosci su bonu e su malu, tragèdias e bona sorti chi ant caraterizau e formau in is sèculus una comunidadi forti e traballanti che sa teuladesa.





GIBA, VIÀGIU IN TIBET GRÀTZIAS A SA COLLEZIONI DECALLÀ

De su 14 de mesi de argiolas e po duus mesis Domu Ibba in Giba at ospitau sa mostra de arti sacra tibetana de sa colletzioni Dellacà. **Professori Enrico Dellacà** est unu mèigu anestesista e de rianimatzioni chi at pigau sa specializatzioni in scièntzia de su dolori (algologia). Oi est unu **Lama Mèigu** e imparat mexina traditzionali cinesa e fait cursus de autosanamentu gràtzias a sessionis de meditatzioni e visualizatzioni. Po issu, sa nexi de is maladies funt is emotzionis. Seus prexus chi sa colletzioni cosa sua, fata de stàtuas, màscaras e ogetus sacrus de sa traditzioni tibetana, si siat pòtzia bisitai a indonu in su cuntestu tìpicu de Domu Ibba.

NUXIS

Su 9 de austu at tentu sutzessu mannu meda sa **Festa de su Addeu**, organizada de sa Pro Loco cun su patrocìniu de su Comunu. Infatis is chi funt andaus a Nuxis - prus de 500 personas - ant cenau in is mesas cuncordadas in is arrugas printzipalis e ant pòtziu tastai is mellus savoris de una borta, bisitai una mostra dedicada a su mobiliu e a sa bistimenta tradizionili e no est mancau su spàssiu po is prus minoreddus gràtzias a is giogus fatus a incuru de s' Associazione Genitori Nuxis.



Foto de sa Coja Maurreddina in Santadi e genti meda abetendi a si setzi a mesa in Masainas.



Un'aina tibetana po pregai e unu momentu de su Flashbook in Tratalias.



TRATALIAS

LETURAS IN LINGUA SARDA PO S'INFÀNTZIA

Su 31 de mesi de argiolas sa Biblioteca at apariciu su **Flashbook 2025**, unu atòbiu de leturas "a ciel sereno" ma chena de bessì a foras de sa biblioteca. Grandu partecipatzioni at tentu custu eventu de leturas po s'infàntzia chi at biu pipieddus de 0 a 13 annus pighendi parti cun interessu e spàssiu.

Is bibliotecàrias ddis ant ligiu contixeddus e ddis ant stentaus cun mùsica e ballus portendi-ddus in logus de atesu cun sa fantàsia de is librus. Eus collaborau nosu puru de su Sportellu linguìsticu ligendi-ddis duus libureddus in lingua sarda chi mannus e piticus ant ascurtau cun prexu e spantu.

MASAINAS

Ocannu puru s'est cunfirmada sa bidda de is sagras. In su mesi de austu nd'ant fatu ses: brebei, fritu mistu (2 bortas), sirboni, pasta fata in domu, curruxonis - totus organizadas a incuru de is assòtzius localis - e turistas medas ma fintzas sardus nd'ant aprofitau po tastai in cumpangia e allegria su mandiai tìpicu de sa traditzioni nostra.

SANTADI

At tentu unu bonu sutzessu de pùbblicu sa de **57 edizioni de sa Coja Meurreddina**, cun s'organizatzioni stravanada de is picocus de sa Pro Loco e de totus is voluntàrius chi si funt afainaus po fai arrennesci sa manifestatzioni in manera perfeta. Genti meda at partecipau, turistas e sardus puru mancai fessat una bella dii de basca ma bentulada.



REGIONE AUTÒNOMA DE SARDIGNA
REGIONE AUTONOMA DELLA SARDEGNA

